

Siunnersuut: Meeqqanut inuusuttunullu ulloq unnuarlu paaqqinnittarfinni inissineqarsimasunut meeqqat inuusuttullu nakuuserfigineqartarnissaat pillugu Namminersornerullutik Oqartussat nalunaarutissaattut nr. xx-itut, xx. qaammat 2009-meersoq

Meeqqanik inuusuttunillu ikiorsiisarneq pillugu Inatsisartut peqqussutaanni nr. 6-imi, 5. december 2008-meersumi § 26a naapertorlugit aalajangersarneqarpoq:

Kapitali 1

Nakuuserfiginnittarneq

§ 1. Meeqqat inuusuttullu nalunaarummi matumani nakuuserfigineqartarnissaat taamaallaat pisassaaq, tamanna tunngavissaqartinneqassappat. Nakuuserfiginnittarnerup qaqugukkulluunniit isumassuineq inuuniarnikkullu perorsaanermik ikiorsiisarneq taarsertassanngilaa. Nakuuserfiginnittarneq pisariaqarfiviagut killiliiffigineqassaq, tamatumani anguniakkamut naammaginnartussaq anguniarneqartassalluni.

Imm. 2. Timikkut attuilluni anusinngorsaaneq inerteqqutaavoq. Sakkulerluni attuisarnissaq inerteqqutaavoq. Sakkulerluni attuisarnissaq ima paasineqassaaq atortumik assersuutigalugu qiteqummik, sakkumik assammut isikkamulluunniit ikkuttakkamik timimulluunniit aalajangiissummik kiisalu sakkumik timimut aalajangiissummik atuisarnissaq. Nikanarsaalluni, asissuilluni allatulluunniit nakkarsaalluni pinnittarnissaq inerteqqutaapput.

§ 2. Meeraq inuusuttorluunniit timaatigut aalajangerlugu, inissisimaffimmulluunniit allamut ingerlanneqassatillugu imaaliornikkut timikkut nakuuserfiginnittarnissat inerteqqutaanngillat:

- 1) Meeraq inuusuttorluunniit ima pissusilersorpat, ataatsimoorfimmiiginnarnissaa illersorneqarsinnaajunnaarpat, imaluunniit
- 2) taamaaliornikkut meeqqap inuusuttulluunniit imminut allalluunniit ajoqusernissaat pinngitsortinniartillugit.

Imm. 2. Imm. 1 naapertorlugu nakuuserfiginnittarnissat pisuni ataasiakkaani pissutsit naapertorlugit naleqquttuutinniarneqartassapput pisariaqanngitsumillu sakkortuuliorfiusassanatik.

Imm. 3. Timikkut nakuuserfiginnittarnissaq pinartumik pisariaqartussaq pinerluttulerinermi inatsimmi § 15 naapertorlugu, pillaasarnermi inatsimmi allatut ajornartumik illersortariaqalerneq pillugu inatsisip aalajangersagaanut ilaatinneqartussaaavoq.

Kapitali 2

Meeqqanut inuusuttunullu ulloq unnuarlu paaqqinnittarfiit immikkoortortaat isumannaallisagaanngitsut

§ 3. Meeqqanut inuusuttunullu ulloq unnuarlu paaqqinnittarfiit immikkoortortaanni isumannaallisagaanngitsuni § 2 naapertorlugu timikkut nakuuserfiginnittarnissaq pisarsinnaavoq.

Kapitali 3

Meeqqanut inuusuttunullu ulloq unnuarlu paaqqinnittarfiit isumannaallisakkat Paaqqinnittarfik isumannaallisagaq

§ 4. Peqqussummi § 26a naapertorlugu meeqqanut inuusuttunullu ulloq unnuarlu paaqqinnittarfik isumannaallisagaq tassaatinneqarpoq ulloq unnuarlu paaqqinnittarfik,

ikinnerpaamik isumannaallisakkamik ataatsimik immikkoortortalik, pisariaqarpallu ataatsimik arlalinnilluunniit isumannaallisagaanngitsumik immikkoortortalik.

Imm. 2. Immikkoortortat isumannaallisakkat tassaatinneqarput ulloq unnuarlu paaqqinnittarfinni immikkoortortat silataasa igalaavisalu ingerlaavartumik parnaaqqatinneqartarnissaat inerteqqutaanngitsut. Immikkoortortaq ulloq unnuarlu naallugu naangajalluguluunniit parnaaqqatinneqartartoq tassaassaaq immikkoortortaq isumannaallisagaq, Ilaqutariinnermut Peqqissutsimullu Naalackersuisoqarfimmit akuerisaasoq.

Immikkoortortani isumannaallisakkani nakuuserfiginnittarneq

§ 5. Meeqqanut inuusuttunullu ulloq unnuarlu paaqqinnittarfiit immikkoortortaanni isumannaallisakkani § 2 naapertorlugu timikkut nakuuserfiginnittarnissaq pisarsinnaavoq.

Immikkoortortami isumannaallisakkami inissiisarnissamut tunngavissat allallu

§ 6. Immikkoortortaq isumannaallisagaq inissiiviusarsinnaavoq ima iliortoqarsimappat:

- 1) Eqqartuussisarnermik inatsimmi § 18b aamma kapitali 5 naapertorlugit parnaarussivimmi paarineqarnissamut taarsiullugu inissiisoqarsimappat,
- 2) inuusuttut isumassorneqarnissaat pillugit pinerluttulerinermi inatsimmi § 112 aamma kapitali 28 naapertorlugit paaqqutarinninnissaq pillugu inissiisoqarsimappat,
- 3) peqqussummi § 26b, imm. 1 naapertorlugu meeraq eqqarsaatigalugu inissiinissaq pisariaqartinneqarsimappat.

Imm. 2. Kommunerisami kommunalbestyrelse inuusuttup immikkoortortami isumannaallisakkami inissinneqarnissaa pillugu aalajangiisinnaavoq, tamatumani imm. 1, nr. 1 naapertorlugu parnaarussivimmi paarineqarnissamut taarsiullugu inissiisoqarpat. Immikkoortortamut isumannaallisakkamut inissiinissaq pillugu kommunalbestyrelsip aalajangiinera Ilaqutariinnermut Peqqissutsimullu Naalackersuisoqarfimmit nalunaarutigineqassaaq.

Imm. 3. Kommunerisami kommunalbestyrelse inuusuttup immikkoortortami isumannaallisakkami inissinneqarnissaa pillugu aalajangiisinnaavoq, tamatumani imm. 1, nr. 2 naapertorlugu paaqqutarinninnissaq pillugu inissiisoqarpat. Immikkoortortamut isumannaallisakkamut inissiinissaq pillugu kommunalbestyrelsip aalajangiinera Ilaqutariinnermut Peqqissutsimullu Naalackersuisoqarfimmit nalunaarutigineqassaaq.

Imm. 4. Kommunerisami kommunalbestyrelse inuusuttup aqqaneq marlunnik ukioqalereersup immikkoortortami isumannaallisakkami inissinneqarnissaa pillugu aalajangiisinnaavoq, tamatumani imm. 1, nr. 3 naapertorlugu tamanna pilersinnagu peqqussummi § 6, imm. 2, nr. 10 imaluunniit § 10 naapertorlugit angerlarsimaffiup avataani inissiinissaq pillugu aalajangiisoqareersimappat. Immikkoortortamut isumannaallisakkamut inissiinissaq pillugu kommunalbestyrelsip aalajangiinera Ilaqutariinnermut Peqqissutsimullu Naalackersuisoqarfimmit nalunaarutigineqassaaq.

Imm. 5. Taamatuttaaq kommunerisami kommunalbestyrelse pisuni imm. 1, nr. 1-3-mi taaneqartuni aalajangiisinnaavoq, immikkoortortami isumannaallisakkatut paaqqinniffimmi/immikkoortortami inissiinissaq sorlermi pissanersoq.

Imm. 6. Kommunerisami kommunalbestyrelse tamatigut immikkoortortami isumannaallisakkami inissiinissaq pillugu angajoqqaatut oqartussaasut nalunaarfigisassavai, periarfissaqarpallu taamatut inissiisoqalersinnagu.

Imm. 7. Immikkoortortami isumannaallisakkami inissiisarnissaq 18-inik ukioqalinnginnermi aallartereerineqassaaq.

Kapitali 4

Immikkoortortami isumannaallisakkami inissiinerup sivilissusissaa

§ 8. Pisuni, § 6, imm. 1, nr. 2-mi taaneqartuni immikkoortortani isumannaallisakkaniititsisarneq sivilunerpaamik qaammatini arfinilinni pisassaaq.

Imm. 2. Pisuni, § 6, imm. 1, nr. 3-mi taaneqartuni immikkoortortani isumannaallisakkaniititsisarneq sivilunerpaamik qaammatini pingasunni pisassaaq.

Imm. 3. Kommunerisami kommunalbestyrelse piffissaliussaniit immikkut ittumik saneqqutsisinnaavoq, tamanna pisuni ataasiakkaani immikkoortortani isumannaallisakkaniititsinermut piumasaqaataasut pisariaqalersissagaluarpassuk. Inuusuttunut 15-ileereersunut qaammatini arfinilinni killiliussaq immikkut ittumik qaammatinik arfinilinnik aammaarluni sivitsuilluni saneqqunneqarsinnaavoq, inuusuttunullu 15-ileereersimanngitsunut qaammatini pingasunni killiliussaq immikkut ittumik qaammatinik pingasunnik aammaarluni sivitsuilluni saneqqunneqarsinnaalluni.

§ 9. § 6, imm. 1, nr. 1-3 naapertorlugu immikkoortortami isumannaallisakkami inissinneqarnerup nalaani inuusuttup akunnerit 24-t ingerlatiinnarlugit akuersissuteqarfigineqaqqaarani immikkoortortamiissimannginnera ilanngunneqartassanngilaq.

Imm. 2. Kommunerisami kommunalbestyrelse inuusuttup immikkoortortami isumannaallisakkamiitinneqarnerata unitsinneqarnera pillugu § 6, imm. 1, nr. 2 aamma nr. 3 naapertorlugit aalajangiissaaq.

Immikkoortortap isumannaallisakkap avataaniittarneq aneersinnaatitaasarnerlu

§ 10. § 6, imm. 1, nr. 1-3 naapertorlugit immikkoortortami isumannaallisakkamiinnermi paaqqinnittarfiup pisortaata akuersissutigisinnaavaa, inuusuttup immikkoortortap avataani suliffeqarsinnaanissaa.

Imm. 2. Inuusuttup akunnerni 24-ni immikkoortortami isumannaallisakkamiittussat ullormut sivikinnerpaamik akunnermi ataatsimi silami aneersinnaatitaasassapput.

Imm. 3. § 6, imm. 1, nr. 1 naapertorlugu inuusuttup parnaarussivimmi paarineqarnissamut taarsiullugu immikkoortortami isumannaallisakkamiitinneqartut paaqqinnittarfiup pisortaa politiit akuersissuteqarnerisigut ilaqartinneqarlutik immikkoortortamiit paaqqinnittarfiullunniit eqqaani piffissami sivikitsumi aneersinnaatitaasassapput, tamatumani tamanna inuusuttunut pissutsit immikkut ittut pisariaqalersikkaangassuk.

Imm. 4. Kommunerisami kommunalbestyrelse paaqqinnittarfiup pisortaata inassuteqareerneratigut aalajangiiffigisinnaavaa, meeraq inuusuttorluunniit § 6, imm. 1, nr. 2 aamma nr. 3 naapertorlugit immikkoortortami isumannaallisakkamiitinneqartoq, piffissami sivikitsumi immikkoortortap avataanut inissinneqarallarnissaa, tamatumani inissiinermi inersimasumik qanimut attaveqartarnissaa isumannaarneqarsimagaangat. Tamatumunnga aalajangiinissaq Pinerluuteqarsimasunik Isumaginniffimmiit akuersissuteqaqqaarnikkut pisassaaq.

Kapitali 5

Nalunaarsuineq nalunaarutiginnittarnissarlu Timikkut nakuusertoqartarnissaanik akuersaartarneq

§ 11. Isumannaallisakanikkut immikkoortortalinni immikkoortaqanngitsunilu inissiinermi nuussisarnernilu § 2 naapertorlugu timikkut nakuusertoqartarnissaanik akuersaartarnermi,

taamatuttaaq allatut ajornartumik illersortariaqalersarnermi, paaqqinnittarfiup pisortaa taassumaluunniit tullersortaa akunnerit 24-t ingerlaneranni immersugassamut nalunaarsuiffissamut paasissutissat pineqartumut tunngassuteqartut imaattut nalunaarsortassavaat:

- 1) meeqqap inuusuttulluunniit aqqa ukiuilu,
- 2) iliuuseqarnerup piffissartaa,
- 3) iliuuseqarnerup sivilissusia,
- 4) iliuuseqarnerup suussusia, aamma
- 5) iliuuseqarnermut peqputaatinneqartoq.

Imm. 2. Meeraq inuusuttorluunniit timikkut nakuusertoqalersitsinermit akuusoq, immersugassamik allattuineq pillugu ilisimatinneqassaaq pisumullu nammineerluni nassuiaataata ilanngunneqartarnissaa periarfissiissutigineqartassalluni.

Imm. 3. Immersugassaaq nalunaarsuiffissaaq paaqqinnittarfimmiitinneqassaaq allattaavinnik katersuivimmi immikkut ittumiitinneqassalluni.

Imm. 4. Paaqqinnittarfiup pisortaata piaartumik immersugassap nalunaarsuutip assilineri kommunerisamut nassiuissavaa.

Imm. 5. Paaqqinnittarfiup pisortaata qaammatip naanerani immersugassap nalunaarsuutip assilineri oqaaseqaatitalerlugu Ilaqutariinnermut Peqqissutsimullu Naalackersuisoqarfimmut immersukkanik misissuisussamut nassiuissavaa.

Akuersaarneqanngitsumik timikkut nakuusertarnej

§ 12. Imm. 2 naapertorlugu kapitalini 1-4-mi maleruagassamik unioqutitsinerit Ilaqutariinnermut Peqqissutsimullu Naalackersuisoqarfimmut nakkutilliisussaataasumut nalunaarsorneqartassapput nalunaarusiarineqartassallutillu.

Imm. 2. Pisuni imm. 1-imi taaneqartuni sulisorisaaq akuusoq, pisup kingorna ulloq ataaseq qaangiutsinnagu tamanna pillugu paaqqinnittarfiup pisortaanut allakkatigut nalunaarusiussaaq, nammineq oqaaseqaatai inuillu pisumik takunnissimasut nassuiaataat ilanngullugit ullut pingasut qaangiutsinnagit nalunaarsuutit Ilaqutariinnermut Peqqissutsimullu Naalackersuisoqarfimmut nassiuissallugit. Nalunaarsuutit imaattunik imaqartinneqassapput:

- 1) iliuuseqarnerup peqquteqalissutaanut pissutsit immikkut ittut,
- 2) pisumut iliuuseqalersitsisumut iliuutsip piffissartaa,
- 3) iliuuseqarnerup piffissartaa,
- 4) iliuuseqarnerup sivilissusia,
- 5) iliuuseqarnerup suussusiata nassuiarneqarnera,
- 6) iliuuseqarnerup siunertaata nassuiarneqarnera,
- 7) kia iliuuseqarneq piliarineraa,
- 8) iliuuseqarnerup ingerlanerani meeqqap inuusuttulluunniit qanoq issusia, aamma
- 9) meeqqap inuusuttulluunniit aqqa ukiuilu.

Imm. 3. Meeraq inuusuttorluunniit timikkut nakuusertoqalersitsinermit akuusoq, immersugassamik allattuineq pillugu ilisimatinneqassaaq pisumullu nammineerluni nassuiaataata ilanngunneqartarnissaa periarfissiissutigineqartassalluni.

Imm. 4. Pineqaatissiissutigineqarsinnaasumik iliuuseqartoqarsimaneranut tunngavissalimmik pasitsaasaqartoqassagaluarpat pisortanit assuarliuteqarfigineqartumik, paaqqinnittarfiup pisortaa taassumaluunniit tullersortaa piaartumik tamanna pillugu nalunaarusiamik Ilaqutariinnermut Peqqissutsimullu Naalackersuisoqarfimmut nassiuissaqassapput, taassuma politiit nalunaarfigissammagit.

Imm. 5. Sulisorisaq alla pisumik takunnissimasoq, ullup ataatsip kingorna nalunaarusiornissamut paasissutissanik piunaffigineqarsimanngitsoq pisussaavoq paaqqinnittarfiup pisortaanut nassuiaatigisassani nalunaarutigissallugu.

Imm. 6. Sulisorisaq alla pisoq pillugu tunngavissaqartumik ilisimasaqartoq taamatuttaaq pisussaavoq paaqqinnittarfiup pisortaanut ilisimasani pillugit nalunaarutiginninnissamut.

Imm. 7. Paaqqinnittarfiup pisortaata Ilaqutariinnermut Peqqissutsimullu Naalackersuisoqarfimmut nalunaarutiginninnerminut peqatigitillugu taassuma assilnera sulisorisamut akuusumut tunniutissavaa, angajoqqaatullu oqartussaasut kommunerisarlu nalunaarutiginninneq pillugu ilisimatissallugit.

Imm. 8. Sulisorisaq, atorfimmut tunngatillugu kukkuluttorsimasut pillarneqaataasinnaasumilluunniit pissusilersortutut nalunaarutigineqartoq pisup pinera ilumoorussilluni saqqummiutissavaa saqqummiussaqaqarninilu pillugu allakkatigit oqaaseqaateqarnissamut periarfissinneqartassalluni. Peqatigitillugu sulisorisaq ilisimatinneqassaaq saqqummiussaqaqarnini pillugu oqaaseqaateqarnissamut pisussaaffeqanngitsoq.

Imm. 9. Sulisorisaq akuusoq paaqqinnittarfimmi pisortaasimassagaluarpat, sulisorisaq paaqqinnittarfimmi tullersortaasup nalunaarutiginninnermini allakkami assilnera paaqqinnittarfiup pisortaanut tunniutissavaa. Ilaqutariinnermut Peqqissutsimullu Naalackersuisoqarfik, angajoqqaatut oqartussaasut kommunerisarlu nalunaarutiginninneq pillugu ilisimatinneqartassapput.

Imm. 10. Ilaqutariinnermut Peqqissutsimullu Naalackersuisoqarfik nalunaarutiginninnerup pissarsiarineqarneraniit sapaatit akunneri arfinillit qaangiutsinnagit ingerlatsinnermut tunngassuteqartut pillugit sunniuteqaatissanik aalajangersaassaaq.

Kapitali 6

Nakkutilliineq, naammagittaalliuuteqarsinnaaneq, pineqaatissiineq allallu

§ 13. Ilaqutariinnermut Peqqissutsimullu Naalackersuisoqarfik nalunaarutip matuma atuutsinneqarneranut maleruagassat nakkutilliivigisassarai.

§ 14. Nalunaarut manna naapertorlugu kommunalbestyrelsip aalajangigaanut naammagittaalliuutit Isumaginninnermut Naammagittaalliuuteqartarfimmut saqqummiunneqarsinnaapput.

Imm. 2. Taamatuttaaq naammagittaalliuut Isumaginninnermut Naammagittaalliuuteqartarfiup aalangiineraniit sapaatit akunneri sisamat qaangiutsinnagit Nunatta Eqqartuussivianut saqqummiunneqarsinnaapput.

§ 15. Naammagittaalliuutigineqartup akissuteqarfigineqalinnginnerani Isumaginninnermut Naammagittaalliuuteqartarfiup Ilaqutariinnermut Peqqissutsimullu Naalackersuisoqarfik, nakkutilliisussaatitaasoq, oqaaseqaateqaqqullugu peqqussavaa. Oqaaseqaammut ilanngullugu sulisorisamiit, pissutsinut naammagittaalliuutigineqartunut ilisimannittumiit, nassuiaat nassiunneqassaaq. § 11, imm. 1 imaluunniit § 12, imm. 1 naapertorlugit nalunaarutiginninneq pisimappat, nassuiaammut immersugassatut nalunaarsuiffiup assilinerarnera ilanngunneqartassaaq.

Imm. 2. Tamatuma saniatigit paaqqinnittarfiup pisortaa taassumaluunniit tullersortaa meeqqamik inuusuttumilluunniit, sulisorisanit naammagittaalliuutigineqartunik ilisimannittuniit pisumullu uppenarsaasuusinnaasuniit oqaloqatiginninneralimmik piaarnerpaamik misissuilissapput. Oqaloqatiginninnerit pineqartut pillugit nalunaarusiortoqartassaaq, nalunaarusiarlu Ilaqutariinnermut Peqqissutsimullu Naalackersuisoqarfimmut, paaqqinnittarfimmik nakkutilliisussaatitaasumut, pisortap

inassuteqaataa ilanngullugu, imm. 1-imi taaneqartunik paasissutissartalerlugu nassiunneqassaaq.

§ 16. Sulisorisamut iliuuseqarnissamut periarfissat, pineqartup atorfeqartitaaneranut atugassarititaasut naapertorlugit, atuutsinneqassapput.

§ 17. Paaqqinnittarfiup pisortaata isumannaassavaa, meeqqat inuusuttullu inissinneqarsimasut kiisalu angajoqqaatut oqartussaasut nalunaarummi matumani maleruagassanik ilisimannilernissaat, taamatuttaaq Isumaginninnermi Naammagittaalliuuteqartarfimmut naammagittaalliuuteqartarnissamut periarfissiissutit ilanngullugit.

§ 18. § 11 aamma § 12 naapertorlugit immersugassatut nalunaarusiat ukiumoortumik nalunaarusiamut katersorneqartassapput, Inatsisartunut saqqummiunneqartartussat.

§ 19. Nalunaarut una meeqqanut inuusuttunullu ulloq unnuarlu paaqqinnittarfinni sulisorisanut tamanut tunniunneqassaaq. Pissarsisimaneq pillugu sulisorisap paaqqinnittarfiup pisortaaniit pissarsisimanini uppersaasissavaa.

Kapitali 7 *Atuutilersitsineq*

§ 20. Nalunaarut 1. juni 2009-mi atuutilersinneqarpoq.

Imm. 2. Peqatigitillugu Meeqqanut inuusuttunullu ulloq unnuarlu paaqqinnittarfiit pillugit kiisalu inuit annertuumik innarluutillit pillugit Namminersornerullutik Oqartussat nalunaarutaat nr. 64, 29. december 1994-imeersoq atuukkunnaarsinneqarpoq.

Namminersornerullutik Oqartussat, ulloq xx. qaammat 2009

Naja Petersen

/

Martha Lund Olsen